

Jahresbericht 2025 für Gewerbeverein Rüschegg

27.4.2026

I ha lang nid gwüsst, wasi zum Jahresbericht söll säge rsp. ufschriebe.

Mini jüngschi Tochter het mer sogar Chat GPT empfohle, aber das het du mi Stolz doch nid zuegla u so hani mi sälber a ds recheriere gmacht.

Ds 2025 isch es Jahr mit vielne Ereignis.

Häbet nid Angscht, i mache scho nid zlang, aber villech chunnts chli quer Beet.

Es het dermit agfange, dass i üser Landesregierig d Frou Keller Sutter Bundespräsidentin isch worde für das Jahr 2025.

Ds 2. Jänner Aperó heimer das mau im Restaurant Caroline im Rüschegg – Grabe gnosse.

Mit feine Pizzali heimer sozäge ds Jahr iiglütet.

Am 20. Jänner isch dr Trump zum 2. Mal Presi vo Amerika worde, u drum hani o Frou Keller Sutter erwähnt. Dir wüsst um das riese Gstürm u Hick hack um Strafzöll, unähr de glich ume nid, aber nähr doch de ume. Es hin u här. Für d Export Industrie e riese „Seich“. Das het Bsüech vor Landesregierig u Wirtschaftsvertreter in Amerika usglöst. Di Zöll si du cho, doch rächtens isches lut Gricht nid u villech gits für Schwyzer Firme ume Gäld zrug. Mittlerwyle heimer im nahe Oschte Chrieg, wo Trybstoffpryse i d Höchi jage u Versorgig vo gwüsse Sache sehr i Frag stellt. Dr Trump macht es riese Chaos, doch lömer das Thema itz besser la sy.

Bi üs ir Schwyz hei mer äs paar Grossereignis dörfe erläbe i däm Jahr. Mir hei ds Basu dr ESC gha u im Summer d Fuessball EM vo de Froue. Das sie Grossereignis, wo mer nid grad all Jahr bi üs hei. Zum ESC isch zerwähne, dass der Kennes Auberson, vo Urben Dänse, dr Amman Hänsi wär si Grossvater gsi, in Basel mitgholfe het bi dä Tanz Darbietige. Uebrigens o bim coole Lied vo Made in Switzerland, gsunge vor Sandra Studer ur Hazel Brugger.

Äs wyters Grossereignis hei mer Endi Ougschte gha mit dem Eidg. Schwingfest ds Glarus, wo für üs Bärner vielleicht nid ganz so gändet het wie mer üs das gwünscht hätte.

Aber im 2028 findet ja de in Thun ds nächste ESAF statt, wo de hoffentlich ä Bärner, u vielleicht sogar ä hiesige mögti gwinne.

Äs tragischs Ereignis isch Endi Mai passiert, wo im Lötschetal ä wälz Bitz Gletscher abbroche isch u ä Teil vom Lötschetal verschüttet u unbewohnbar gmacht het. Leider het ei Mönsch ds Läbe verlore, aber bi däm Usmass vo däm Felssturz ischs äs Wunder, dass nid meh Lüt gstorbe sie. 130 Hüser si betroffe, sy verschüttet, kaputt und unbewohnbar.

Zrugg zu Rüscheegg. Mir hei mit üsem Verein am 8. Ougste bi schönem Wätter äs Brätle gmacht im Schlatt. Es het alles passt, mit der Beteiligung hätts no ziemlich Luft gäge obe.

Es Highlight isch, dass mer bi de Swissskills, wo im September ds Bärn stattgfunde hei, usem Rüscheegg ä Goldmedallie-Gwinner hei. U das ir Sparte Polymechaniker. Dr Björn Ulrich vo Rüscheegg, dr Junior vo Plötschli Pädu, het die Ufgabe am beschte glöst. D Lehr heter bi Gilgen Doors gmacht. Mir gratuliere ihm u syre ganze Familie ganz härzlich derzue.

O ir Chesi Mamishaus, under der Leitig vom Urs Nussbaum het e Lehrtochter bi de Swissskills mitgmacht u isch gueti 5. worde als Milchtechnologin.

Ja, när wird's scho langsam Herbst u da isch no üse Usflug ufem Programm gstande. Mir sy Endi Oktober uf Bulle u hei dert die Wäutmarke Liebherr Maschines glehrt bchönne. Mir hei gstuunet ab däre Grössli u Organisation vo däre Firma. I däne riesige Hallene heimer Produktion vo riesige Motore, Reihe 6 Zylinder, V8, V12 u V16 Motore gseh. Alles Sache, wo si für ihri grosse Bagger, Pneulader u wyterei grossi Maschiene bruche. Znacht hei mer im ne abglägne Alpbeizli ir Nöchi vo Broc gnoh u sie nach em feine Fondue wieder heizue gfahre. U zum Schluss vo üsne Aläss het am 6. Dezember wieder dr traditionell Samichlouseabe stattgfunde, wo o das Jahr bi gäbigem Wätter uf grosse Aklang gstosse isch.

I danke a däre Stell allne Häfer u Beteiligte, wo zu dene Aläss u zum Vereinsläbe bitrage u immer wieder mit apacke. Merci vielmal!

Der Präsident,
Christian Nydegger